

Kalaallit napparsimasut danmark-imi katsorsartittarnerannut atatillugu ilaqutaasup/t ineqartinneqartarnerannut atatillugu, katsorsarneqartussa q rigshospital-imi napparsimmavimmiluunniit allami suliarineqassatillugu ilaqutaasup/t unnuiffigisinnaasaannik pilersitsisinnaanerata iluaqutissartai aammalu aporfissarisinnaasaasa misissorneqarnissaannik, ilanngullugu pilersitsinerup suut piumasaqaatitariumaagai, soorlu aningaasartuutissat aammalu sulisussanut tunngasut pillugit Naalakkersuisut peqquneqassasut inatsisartut aalajangiiffigisassaattut siunnersuut.

(Inatsisartunut ilaasorta, Anthon Frederiksen, Partii Naleraq)

Akissuteqaat

(Peqqissutsimut Naalakkersuisoq)

Siullermeerneqarnera

Kalaallit napparsimasut Danmarkimi katsorsartinneranni qanigisaasut ineqartinneqartarnerannut atatillugu katsorsarneqartussa q Rigshospital-imi napparsimmavimmiluunniit allami suliarineqassatillugu qanigisaasut unnuiffigisinnaasaannik pilersitsinerup iluaqutissartaasa aporfissarisinnaasaasalu misissorneqarnissaannik, ilanngullugu pilersitsinerup suut piumasaqaatitariumaagai, soorlu aningaasartuutissat sulisussanullu tunngasut pillugit Naalakkersuisut peqquneqassasut Inatsisartut aalajangiiffigisassaattut siunnersuummut Naalakkersuisut qujapput.

Napparsimasunut qanigisaasut pillugit malittarisassat ilaatigut ukunani allaatigineqarput: Napparsimasup najugaqarfimmi avataani misissorneqarnerani katsorsarneranilu kiffartuusinerit pillugit Namminersornerullutik Oqartussat nalunaarutaat nr. 2, 24. januar 2005-meersoq aamma aaqqissuussami nutaami 2017-imi januaarip aallaqqaataanni atuutilersumi: Qanigisaasut Kalaallit Peqqissartut illuanniittarnerat.

Nalunaarummi § 8-mi aalajangerneqarpoq napparsimasut inuunerminnik ulorianartorsiortut Danmarkimi katsorsartittut ilaqtaminnit qanigisaminnilluunniit ataatsimit peqqinnissaqarfiup akiligaanik ingiallortaasinnaasut. KPI-ni najugaqarnissamat pisinnaatitaaffik napparsimasup perulukkunnaarnissaata tungaanut atuuppoq, tak. § 11 imm. 3. Meeqqat 15-it ataallugit ukiullit angajoqqaaminnik imaluunniit inersimasumik qanigisaminnik allamik ingiallorteqarsinnaatitaapput.

Aaqqissuussineq nutaaq naapertorlugu KPI-ni napparsimasut ilaqtaminnik ataatsimik akeqanngitsumik sinittarfimmi ineqateqarsinnaapput, taamaattorli KPI-ni inissaqartitsineq apeqqutaasassalluni. Napparsimasoq Kalaallit Peqqissartut Illuanni taamaallaat najugaqartil-lugu napparsimasup ilaqutaa akeqanngitsumik najugaqarsinnaavoq.

Tassa napparsimasoq KPI-niinnermini Danmarkimi napparsimmavimmut unitsinneqarpat qanigisaasoq akeqanngitsumik KPI-ni najugaqarsinnaanngilaq. Inissaqarpat qanigisaasoq akiliilluni KPI-miissinnaavoq. Soorunami Kalaallit Peqqissartut Illuat peqqinnissaqarfimmi napparsimasunit atorineqarnissaa sallinneqassaaq. Kalaallit Peqqissartut Illuanni napparsimasup qanigisaa inissaqartinneqanngippat pineqartup nammineq ineqarnini isumagissavaa.

Naalakkersuisut eqqumaffigaat KPI-nni inissaaleqisoqartartoq aamma siunnersuummi siunertarisaq ajunngitsuusoq Naalakkersuisunit paasineqarsinnaammat akuersissutigineqartussatut inassutigineqarpoq.